

Sing vooraf staande: Psalm 107:2 (p. 533)

- 2 In woesteny verlore, / was daar vir hul geen pad
wat hul langs regte spore / kon heenlei na 'n stad.
Gebrek aan drank en brood / sou hulle laat versmag het
as God nie in hul nood / op hul geroep geag het.

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die
kragtige werking van God die Heilige Gees.

Amen.

Lofpsalm 47:1 (p. 240)

- 1 Juig, o volke, juig! Handklap en betuig / voor die HEER jul vreug! Wees in God verheug!
Sing Hom lof en prys op verhewe wys, / want bo al wat leef en voor Hom moet beef,
sal sy septer wink en sy glorie blink – / Allerhoogste in eer, groot is God die HEER!

Gebed

Psalm 48:5 (p. 245)

- 5 Laat Sions berg weerklink van vreug! / Laat Juda's dogters hul verheug,
omdat Gods oordeel hul verbly het – / dié oordeel wat sy volk bevry het.
Aanskou die stad met skanse, / paleise, toringtranse –
hoedat hul pryk met nuwe prag. / En meld dit aan die jong geslag:
Die God is onse God, en Hy / sal tot die dood toe ons gelei.

Skriflesing: Hebreërs 4.

Teks: Hebreërs 4:16; Kategismus Sondag 35

**Laat ons dan met vrymoedigheid na die troon van die genade gaan,
sodat ons barmhartigheid kan verkry en genade vind om op die regte
tyd gehelp te word. (Hebreërs 4:16 AFR53)**

Een van die maniere waarop ons na die troon van genade gaan, is om vir die gebruik van
die heilige Nagmaal aan die Here se tafel aan te sit. Kom ons kyk na die rol wat die
Nagmaal speel in ons geloofslawe. Ons kyk na die volgende:

- 1. Hoe openbaar die Nagmaal die grootheid van die Here Jesus Christus?**
- 2. Die gaste aan die Nagmaaltafel**
- 3. Die tug en die Nagmaal**

1. Hoe openbaar die Nagmaal die grootheid van die Here Jesus Christus?

Aan die Nagmaaltafel is sondaars wat daar saamkom voor die Here se genadetroon. Die
Here jaag hulle nie daar weg nie. Hulle staan daar in die Naam van die Here Jesus
Christus.

- God se geregtigheid laat hulle juis daar toe omdat die verlossingsgenade van die
Here Jesus Christus dit moontlik maak.
- Die Here Jesus het eerste na God toe gegaan:
 - Hy het gegaan met versoening van ons sondes, waarvoor Hy gestraf is.
 - Nou is Hy daar by die troon besig om vir ons voorbidding te doen.

In die Nagmaal sien ons die grootheid van die Here Jesus se werk.

- Hy gaan sterf aan die kruis – Hy bring 'n offer na die God van alle tye toe, naamlik
sy eie lewe.
- Daarmee betaal Hy vir alles wat ons verkeerd gedoen het.

Die resultaat daarvan is dat ons volkome vergewing van sondes van die Vader gekry het. Verder ook nog dat die kerk toegerus word met blywende tekens en seëls van die verlossingswerk van die Here Jesus, naamlik die doop en die Nagmaal.

Nog 'n resultaat is dat ons op 'n onsigbare manier, dit is geestelik, met Jesus gemeenskap het. Ons lees dit in 1 Korintiërs 11:25 vv:

Hierdie beker is die nuwe testament in My bloed; doen dit, so dikwels as julle daaruit drink tot my gedagtenis. Want so dikwels as julle hierdie brood eet en hierdie beker drink, verkondig julle die dood van die Here totdat Hy kom.

(1 Korintiërs 11:25 AFR53)

Dit is seker gepas om die opmerking te maak dat ons net moet onthou dat ons nie uit ons eie na die Nagmaaltafel toe gaan nie.

- Ons word deur die Heilige Gees daarheen geneem, want Hy laat ons glo en maak daarom ook die behoefte in ons wakker om die Nagmaal te gaan vier.
- Die Nagmaal openbaar ook aan ons waar Jesus Christus nou is en wat Hy daar doen.

Hy is nie liggaamlik saam met ons aan die Nagmaaltafel nie, want Hy sit nou aan die regterhand van sy Vader, en daar tree Hy vir ons in met sy voorbidding!

- Hy is nou in die hoogste heerlijkheid.
- Hy verseker ons van vergifnis van sondes maar terselfdertyd bid Hy ook by die Vader vir ons en smee Hy ook die Vader om ons ons oortredinge te vergewe.

Dis hoe die Aanbieder van die Nagmaal lyk.

2. Die gaste aan die Nagmaaltafel

Hulle is almal onreine mense – almal skuldig voor die Here oor al hulle sondes.

- Maar hulle moet ook in hulleself 'n afkeer hê van hulle sondes.
- Dis waarom daar in ons teksvers staan dat ons na die troon van genade toe moet gaan.

Daar moet twee dinge by hulle aanwesig wees as hulle Nagmaaltafel toe kom:

- Die een is dat hulle almal aan die tafel van die Here moet kom aansit met berou oor wat hulle verkeerd gedoen het.
- Die ander een is dat hulle moet kom aansit met die gebed om vergifnis vir hulle verkeerde dade.

Waarom kom al die gaste?

- Omdat hulle vertrou op die liefde en die verlossing van die Here – al is hulle ook hoe skuldig .
- Hulle weet dat die Here se liefde so groot is dat Hy ook hulle oorblywende swakheid vergewe.

Daar moet by elke mens wat aan die Nagmaaltafel kom aansit, die volgende dinge teenwoordig wees:

- Daar moet die begeerte wees dat die Here hom/haar innerlik weer nuwe krag moet gee.
- Hy/sy moet die behoefte hê om met hierdie nuwe innerlike krag in sy uiterlike lewe die sonde te kan afsterf en tot eer van die Here kan leef.

- Die Nagmaalgebruiker moet die hede en die toekoms – alles – van die Here verwag.

Maar daar is ook mense wat nie aan die Nagmaaltafel mag kom aansit nie. Die Here waarsku dat Hy sulke mense met sy oordeel inwag! Ons lees van hulle in Romeine 2:5:

Maar deur jou verharding en jou onbekeerlike hart is jy besig om vir jouself straf op te gaar vir die oordeelsdae, wanneer God sy regverdige oordeel sal uitspreek.
(Romeine 2:5 AFR53)

Sulke onboetvaardige mense wat net 'n skyn van bekering het, mag nie met die Here gemeenskap beoefen nie.

- Skynheilige mense besmet die Nagmaaltafel en maak die tafel onrein.
- Hulle moet van die Nagmaal af wegbly.
- Daarom word daar ook geleer dat sulke mense 'n oordeel oor hulleself eet en drink.

3. Die tug en die Nagmaal

Die kerkraad is die mense wat die Here deur die gemeente verkies het om onder andere toesig te hou oor die sakramente.

- Hulle moet toesien dat die sakramente reg bedien word en
- dat die sakramente ook nie ontheilig word nie.

Hoe sal die kerkraad weet wie Nagmaal mag gebruik en wie nie? Die opdrag van die ouderlinge word mooi beskryf in Handeling 20:28. Die ou vertaling lees:

Gee dan ag op julleself en op die hele kudde waaroor die Heilige Gees julle as opsieners aangestel het om as herders die gemeente van God te versorg, wat Hy deur sy eie bloed verkry het. (Handeling 20:28 AFR53)

Die nuwe vertaling lees:

Pas julle self op en die hele kudde wat die Heilige Gees onder julle sorg gestel het. Soos wagers 'n kudde versorg, so moet julle die gemeente van God versorg wat hy vir Hom verkry het deur die bloed van sy eie Seun.
(Handeling 20:28 AFR83)

Hierdie Skrifgedeelte het baie verrykende implikasies, want dit gee aan die ouderlinge die opdrag wat ook die Nagmaal raak.

- Daar mag dus slegs mense aan die Nagmaaltafel kom wat onder die toesig van die kerkraad staan, want die kerkraad moet kan getuig dat hierdie mense opreg is in hulle geloof.
- Dit is waarom daar voor Nagmaal huisbesoek gedoen word by elke lidmaat.
 - Een van die dinge wat by daardie huisbesoek gedoen moet word, is dat die ouderlinge lidmate wat in 'n bepaalde sonde volhard moet vermaan om hulle te bekeer.
 - As dit gebeur dat iemand nie van sy sondes wil afstand doen nie, moet sodanige persoon ter wille van die heiligheid en die erns van die Here Jesus se werk, van die Nagmaal af weggehou word, want die kerkraad het by die Here die opdrag om toe te sien dat die heiligheid van die sakramente bewaar en beskerm word.

Dit gebeur soms dat lidmate om die een of ander rede in hulle eie gemeente spanning veroorsaak en dan die sakramente verbied word.

- Dan gaan hulle na ander gemeentes toe wat nie van hulle dinge weet nie, en vier die Nagmaal daar. Dit is uiteraard heeltemal verkeerd.
- Daarom moet iemand wat van 'n ander Gereformeerde kerk af by ons is wanneer ons Nagmaal vier, en saam wil Nagmaal vier, 'n brief van sy tuiskerkraad toon dat hy/sy onberispelik is in sy lewe.
- Sy gemeente moet hom/haar by ons aanbeveel om die betrokke lidmaat toe te laat om saam met ons die gemeenskap met die Here aan sy tafel te vier.

Dit is waarom ons kerkverband nie gewoonlik lidmate van ander kerke saam met ons laat Nagmaal gebruik nie.

- Dis nie omdat ons dink hulle is ongelowiges nie – allermens.
- Ons kan net niks van hulle voor God getuig nie, en ons het die uitdruklike opdrag van God om oor die gemeente te waak. Daarom moet hulle by hulle eie gemeente die Nagmaal gaan vier of die getuienis van hulle gemeente af saamneem na die gemeente toe waar hulle wel wil gaan Nagmaal vier.

Wanneer daar tug uitgeoefen word oor 'n lidmaat wat volhard in 'n bepaalde sonde en hom verhard, is die bedoeling glad nie om die persoon uit die kerk uit te dryf nie.

- Die bedoeling is dat die persoon sy eensaamheid moet beleef as hy sien hoe die ander lidmate gemeenskap met die Here en met mekaar beoefen, en hy daarvan uitgesluit is.
- Hy sal dan deur hierdie belewenis van eensaamheid beweeg word om sy sonde te laat vaar sodat hy weer in die gemeenskap van die gemeente opgeneem kan word.

Die Nagmaal is 'n maaltyd wat die gemeenskap met die genade van God aan ons demonstreer.

- Volharding in die sonde is om die Here te verwerp.
- Daarom kan hierdie twee dinge nie saamgaan nie.

Die Nagmaal se doel is dus dat ons baie skerp die genade van die Here Jesus kan beleef.

- Die Nagmaal troos ons, want dit leer ons dat ons in daardie oordeelsoomblik die oordeel van God sal oorleef omdat die Here Jesus se kruisdood vir ons voorsiening gemaak het dat ons vrygespreek gaan word
- Die sakrament verseker ons dat ons met ewige saligheid beklee gaan word.

Ons maak weer gereed om Nagmaal te vier. Laat ons elkeen ons dan self ondersoek en verootmoedig oor die sondes wat nog in ons lewe.

Kom dan Nagmaal toe met verlange om by God te wees, en met u oë gerig op die Here en sy genade.

Kom ons lees saam wat die Heidelbergse Kategismus in Sondag 35 van al hierdie dinge leer:

Vraag 96: Wat eis God in die tweede gebod?

Antwoord: *Ons mag God op geen enkele manier afbeeld nie (a) en Hom op geen ander manier vereer as wat Hy in sy Woord beveel het nie (b).*

(a) Jes 40:18, 19, 25; Deut 4:15, 16; Rom 1:23; Hand 17:29. (b) 1 Sam 15:23; Deut 12:30; Matt 15:9.

Vraag 97: Mag ons dan glad nie beelde maak nie?

Antwoord: God kan en mag op geen enkele manier afgebeeld word nie (a). Die skepsels mag wel afgebeeld word, maar God verbied dat ons van hulle afbeeldings maak en besit om dit te vereer en Hom daardeur te dien (b).

(a) Jes 40:25. (b) Eks 34:17; 23:24; 34:13; Num 33:52.

Vraag 98: Mag ons beelde as “boeke van die leke” in die kerkgebou toelaat?

Antwoord: Nee, want ons moet nie wyser as God wil wees nie. Hy wil sy Christene nie deur stom beelde nie (a), maar deur die lewende verkondiging van sy Woord laat onderrig (b).

(a) Jer 10:8; Heb 2:18. (b) Rom 10:14, 15, 17; 2 Pet 1:19; 2 Tim 3:16, 17.

Amen.

Slotgebed

Slotpsalm 23:3 (p. 107)

- 3 U bring vir my die tafel in gereedheid, / my hoof druip olie en my beker vloei van wyn,
'n bron van goedheid stroom vir my gedurig; / dit is my gees 'n vreug, my vyande 'n pyn;
dit kroon my lewe met u welbehag; / en in u huis, daar bly ek al my dae.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Hulpdienspredikant
Gereformeerde Kerk Clanwilliam
Datum: 4 November 2012